

ՉԱՅՆ ՄԸ ՀՆՉԵՑ...ԱՐՑԱՒԻ ՀԱՅՈՑ ԼԵՌՆԵՐԷՆ

Posted on November 10, 2022 by Keghart



Category: [Editorials](#)



Keghart.org խմբագրական, 10 Նոյեմբեր 2022

Հոկտեմբեր 30-ին կրկին անգամ Արցախի ժողովուրդը արտայայտեց իր կամքը՝ ի հեճուկս թուրքազերի կողմէն հնչած ահաւոր սպառնալիքներու: Արդարեւ, քառասուն հազարէ աւելի հայուքին մայրաքաղաք Ստեփանակերտի մէջ նախաձեռնութիւնը առաւ յայտարարելու թէ կը մերժէ ենթարկուիլ կամ որեւէ տեսակի ենթակայութեան տակ գտնուիլ ցեղասպան Ատրպեյճանի:

Մինչ երեւանի քաղաքական այրերը ցոյց չեն տար որեւէ նախաձեռնութիւն եւ կը ջանան «խաղաղութեան պայմանագիր» ստորագրել մեզի համար անյայտ կամ ոչ յստակ պայմաններով, անդին Արցախի հայուքինը մէկ մարդու պէս յստակօրէն կը յայտարարէ իր ինքնակախութեան իրաւունքը՝ յարգելով միջազգայնօրէն ընդունուած ազգային ինքնորոշման սկզբունքները:



Արցախի

ժողովուրդը արդէն 1990-ական թուականներուն յարգելով այն ատենուան Խորհրդային Միութեան սահմանադրութեան համապատասխան տրամադրութիւնները, իր կամքը արտայայտեց եր դուրս գալու իրեն պարտադրուած ենթակայութենէն: Դժբախտաբար սակայն, բացառելով անկախութեան անմիջապէս յաջորդող տարիները Հայաստանի Հանրապետութեան յաջորդական իշխանութիւնները չգտնուեցան իրենց պարտականութեան բարձրութեան վրայ եւ ինքնավարութիւն հռչակած Արցախը դուրս մղեցին բանակցային գործընթացէն: Ասոր «գլխաւոր հերոսն» էր Ռոբերտ Քոչարեան: Անոր յաջորդած Սերժ Սարգսեանն ալ շատ տարբեր չեղաւ եւ Արցախը ձգուեցաւ իր

ճակատագրին: Չարմանալին այն է, որ այս երկու նախագահներն ալ...արցախցի էին:

Որքանո՞վ անոնք կը ներկայացնէին **բուն ժողովուրդը**, հողին վրայ ապրող ու ստեղծագործող գանգուաճներուն ցանկութիւնները: Յետագայ գործունեութիւններէն պարզուեցաւ միայն մէկ բան, որ այդ նախագահներն ու իրենց նման մտածող թէ՛ արցախցի եւ թէ՛ «հայաստանահայ» պետական այրերէն շատեր հսկայական հարստութիւններու տէր դարձած էին:

Այո՛, «ձայն մը հնչեց» եւ այդ ձայնը պէտք է արձագանգ գտնէ ոչ միայն ՀՀ-էն ներս, ուր շահադիտական «ընդդիմութիւն» մը հրաժարականներ կը պահանջէ, ուր քոչարեանական աւազակախումբը վերջին ճիգերը կը թափէ հաճելի դառնալու «մեծ պոսիս»՝ Փութինին, իսկ վերջերս ալ լայն հայ գանգուաճներուն, ուր իսկական ու անշահախնդիր ընդդիմադիրներ չեն կրնար տակաւին իրարու քով գալ:

Այս բոլորին վրայ կ'աւելնայ նաեւ «մեծ պոսիս» շրջանակէն «վերջին պահուն» Արցախ վայրէջք կատարած տարատնկեալ Ռուբէն Վարդանեան: Բնականաբար հարց կը ծագի՝ ի՞նչ գործ ունի ան Ստեփանակերտի մէջ, երբ մեզի համար յստակ է իր հաւատարմութիւնը «մեծ դաշնակցի» այսօրուան ղեկավարութեան եւ հսրայելի հետ ունեցած «տարօրինակ» կապերուն: Կը յուսանք որ վերջինս եւ իր նման արտաքին ու ներքին ուժեր չեն շեղեր Արցախի ժողովուրդին ինքնորոշման պահանջքի ընթացքը կամ չեն առեւանգեր շարժումը:

Միջազգայնօրէն ընդունուած սկզբունքներու բոլոր տարրերը յարգած Հերոսական Արցախը «Միջազգային հանրութենէն» կ'ակնկալէ **գործո՛ւն** վերաբերմունք եւ ոչ թէ շրթնային ծառայութիւն ու վերացական համակրական արտայայտութիւններ: Մինչ Միջազգային հանրութիւնը թիկունք կեցաւ Քոսովոյին, ի՞նչ պիտի ընէ ան հիմա, երբ նման պահանջատիրութեան առջեւ կը գտնէ ինքզինք: Արդեօ՞ք նորէն ականատես պիտի ըլլանք «սեւ ոսկիի» ու հայու արեան միջեւ առաջինի նախընտրութեան, կամ նորէ՞ն պիտի լսենք «նաւերու Արարատ լեռ բարձրանալ չկարենալու» արդարացումը:

Լաւ առիթ մը ներկայացած է հիմա հայութեան՝ յատկապէս տարածաշրջանին մէջ բազմաթիւ դերակատարներու շահագրգռուածութեան հետեւանքով: Ատենն է որ օրուան իշխանութիւնները առնեն վճռորոշ քայլեր եւ մանր-մուկ նկատառումներով չտարուին: Ատենն է գործնական ու հաշուողուած քայլեր առնելու, հնարաւորին չափ գործակիցներ ու համակիրներ գտնելու երեք ցամաքամասերու խաչմերուկին վրայ գտնուող պետութիւններէ ներս: Ատենն է դիւանագիտական եւ հանրային յարաբերութեանց աշխոյժ գործընթացի: Ատենն է այս գործին լծել «իւրայիններէն» դուրս նաեւ դիւանագիտական կարելոր փորձառութիւններ ձեռք ձգած հայ քաղաքագետներ:

Այս կացութեան մէջ իրաւունք չունինք մէկ երկվայրկեան իսկ կորսնցնելու: Իրաւունք չունինք մանր-մուկ ու ճղճիմ տարակարծութիւններով յոգնեցնելու մեր միտքերը եւ

սպառնալու մեր ուժերը: Ընելիք ունի ՀՀ-ի ժողովուրդը, որ պետք է դուրս գայ այլեւս իր ընկճախտէն, անտարբերութեան ճահիճէն եւ ցոյց տայ որ ինք ատակ է վեր խոյանալու առօրեականէն եւ ինչպէս մօտիկ անցեալին, կրկին անգամ ցոյց տայ վճռակամութիւն: Նոյնքան կարելոր է նաեւ մեր հայրենական պետութենէն ներս արմատաւորել ՕՐԵՆՔԻ գործադրութիւնը, որուն առջեւ պատասխանատու են ԲՈՒՈՐԸ:

Իրերու այս դրութեան մէջ չափազանց կարելոր է նաեւ սփիւռքի շօշափելի մասնակցութիւնը: Ատենն է որ սփիւռքը դուրս գայ յանցաւոր կրաւորականութենէ, կուսակցական նեղմտութիւններէ եւ իրմէ դուրս մղէ «մերոնք-ձերոնք» ախտաւոր մօտեցումները: Ատենն է մանաւանդ հոժ խումբերով Հայրենիք վերադառնալու եւ թիկունք կենալու մեր ռազմիկներուն եւ առողջ ու անկաշառ ուժերուն:

Հայրենադարձութիւնը գոյութենական անհրաժեշտութիւն մըն է, որ պետք է ըլլայ կազմակերպուած ու նպատակասլաց, յատկապէս մեր երիտասարդութիւնը պետք է քաջալերել եւ մղել միանալ հայրենի քոյրերու եւ եղբայրներու ջոկատներուն, մարզուիլ կողք-կողքի, «հաց կիսել», փոխանցել փորձառութիւններ զանազան մարզերէ ներս՝ էլեկտրոնային մարտավարութիւն, լեզուական եւ հանրային յարաբերութեան (PR) ունակութիւններ: Ատենն է որ մեր ազգային-քաղաքական կազմակերպութիւնները ընդունին այս մարտահրաւերը եւ անցնին որոշակի քայլերու:

«Ձայն մը հնչեց...Արցախի լեռներէն». լսենք այդ ձայնը եւ կրկին դառնանք մէկ բռունցք:

Comments



Armo – 2022-11-10 17:36:18

Իսկ երբեւէ հարց տվե՞լ եք, թե Արցախը ո՞ր մի երկրից կանկախանա:



Արմենակ Եղիայեան – 2022-11-10 12:12:53

Հոյակապ խմբագրական մըն է իր բովանդակութեամբ՝ գաղափարներով, ցանկութիւններով եւ առաջադրանքներով: Ազգային-հայրենասիրական իսկական ուղեցոյց մը: Վարձքդ կատար: Հիմա լեզուական կարգ մը թերիներ: - --Խորագիրին միայն առաջին բառը պէտք է գլխագրել՝ «Ձայն մը հնչեց ... Արցախի հայոց լեռներէն», եւ ոչ թէ բոլորը: ---Յետագայ բառ չունինք. ունինք հետագայ՝ հ-ով: ---թէ՛ արցախցի եւ թէ հայաստանահայ... Պէտք է շեշտել երկրորդ թէ-ն եւս՝ թէ՛... եւ թէ՛... ---Չեն առեւանգեր շարժումը Շարժումը կին կամ աղջիկ չէ ,որ առեւանգեն: Պէտք է ըսել՝ «չեն իւրացներ շարժումը»: --- բազմաթիւ շահագրգռուածութեան հետեւանքով Պէտք է ըսել՝ շնորհիւ եւ ոչ թէ հետեւանքով: ---հաշուըուած Պէտք է գրել՝ հաշուել-հաշուուիլ-հաշուուած-հաշուած Ուրեմն՝ հաշուած: Եւ շնորհակալութիւն: